

**Празднование Пресвятей Владычице нашей Богородице
и Приснодеве Марии, ради иконы Ея, именуемая
«Снетогорская»**

На велицей вечерни

Блажен муж: 1-й антифон.

На Господи, воззвах: стихиры, глас 1:

Приидите, вернии,/ воспоим Госпожу и Владычицу нашу Богородицу/ и явлению чудотворная Ея иконы возрадуемся./ Тоя бо покровом спасаемся/ и милости Господней Ея предстательством взыскуем,/ в радости духовней взывающе:/ молитвами Матере Твоя, Боже, помилуй нас.

Идеже преподобномученицы Снетогорстии/ первее сожжени быша,/ тамо Церковь Богородицы из камене паки зиждется/ и образом Пречистыя благолепно украшается./ Темже торжество Ея ныне совершающе, вопием:/ не лиши нас милости Твоя,/ Пресвятая Владычице.

Егда на горе Снятней/ чину монашескому возобновитися благоволила еси,/ тогда, во обитель черноризиц собравши,/ в знамение священноначалия Твоего преславную икону тем даровала еси./ И ныне вопием Ти:/ Пресвятая Богородице,/ сохрани нас под кровом Твоим.

О, Всемилостивая Госпоже Богородице,/ Небесе и земли Царице,/ от безплотных сил восхваляемая/ и от земнородных воспеваемая,/ призри благосердием на обитель нашу Снетогорскую,/ подаждь ей мир и благостроение,/ даруй Свой прокров и заступление,/ да сопричтутся песнословцы Твоя к лику богоизбраннаго стада.

Слава, и ныне, глас 6:

Днесь обитель Снетогорская светло красуется/ и с ней вся земля Псковская/ в праздновании честнаго образа Пречистыя радуется,/ Божия бо Мати Сыну предстоит,/ небеснии Архистратизи с трепетом Ей служат,/ святии сродницы наши милости нам просят./ Мы же, зряще честное Ея изображение/ в день торжества духовнаго, воспоим:/ молитвами Пречистыя Матере Твоя, Боже, помилуй нас.

Вход. Прокимен дне. Чтения три Богородицы.

На литии стихиры, глас 8:

Ныне обитель Снетогорская на торжество верных созывает,/ чудное бо видение зрится:/ на престоле Всецарица восседает/ во объятиях Вседержителя Христа держащи./ Се торжество Твое, Всеблагословенная,/ се явление святых святейшия славы Твоя.

Глас тойже:

Подобен: О, преславнаго чудесе:

О, преславнаго чудесе! Небесе и земли Царица,/ горними силами величаемая/ и от преподобных ублажаемая,/ ныне гору Снятную лика Своего изображением милостивно обогащает./ О, святых обителей Игуменне Преславная!/ Не престани и на будущее время/ милости и чудеса изливати/ на всех, во иночестве добле подвизающихся.

Возлюбиша Тя, Пречистая, Мати Бога нашего,/ людие Псковстии,/ егда храм Рождеству Твоему/ на Снятной горе по завету Довмонта благовернаго здаша,/ писаньми жития Твоего украсиша/ и, яко некий многоценный бисер,/ изображение пренебесныя славы Твоя/ посреде оных поместиша.

Слава, глас 2:

Образ Твой, Владычице, умное зеркало есть,/ в нем же добродетели Твоя зряще,/ немощнии каемся и жизнь нашу исправити тщимся./ На сем поприщи буди нам твердая Помощница,/ да благоугодни Господеви обрящемся.

И ныне, глас тойже:

Прообразуемое древле ныне исполнися:/ Дева бо Мати предреченная роди Сына,/ Слово Отчее, прежде век Сущее./ Сего ради поклоняемся славному образу Ея,/ яко чудная величия Всенепорочныя нам являет.

На стиховне стихиры, глас 1:

Песнословят ныне Ангели на Небесех,/ ликовствуют праведнии вси,/ мы же, людие вернии, Препоблагой Заступнице хвалу поем смиренно,/ Та бо честным Своим покровом град Псков сохраняет,/ во многотруднем житии сем верным помогает,/ лик иноческий ко спасению наставляет,/ яко Всемилостивая о людех Заступница.

Стих: Приведутся Царю девы в след Ея,/ искренния Ея приведутся Тебе.

Возлюби Тя Господь, Владычице, и паче всех доброту в Тебе обрете,/ смирением бо превознесена,/ кротостию же преукрашена явилася еси,/ чистота Твоя и ангелом предивна есть,/ сего ради почи Вседержитель на руку Твою,/ херувимский Себе Престол в Тебе устроив.

Стих: Слыши, Дщи, и виждь,/ и приклони ухо Твое.

Приклонилася еси иногда, Препоблагословенная в женах,/ на целование Архангелово,/ темже род человеческий спасение прият,/ тако и ныне приклонися на моления наша/ и приведи ны к блаженному пристанищу вечныя радости,/ во еже славити Господа и пети благодарение о Тебе,/ Благой Заступнице рода христианскаго.

Слава, и ныне, глас 2:

В церкви славы Бога нашего пречудное видение ныне зрится:/ Мати Господня длани к Сыну простирает/ и с небожителю о нас ходатайствует./ Мы же во умилении сердечном воспоим:/ святой воеводо пламенновидный Михаиле,/ благовестниче таин Божиих Гаврииле,/ преподобне отче наш Иоасафе,/ Довмонте княже благоверный,/ с Пречистою молити Господа о нас.

Тропарь, глас 5:

Ко образу Твоему, о Госпоже, припадаем,/ милости Твоя улучити чающе,/ Божественною бо славою облечена,/ о людех непрестанно милосердствуеши,/ не остави убо сирых нас, о Мати Всепетая,/ сподоби и в земней юдоли и в Небесных обителях/ чистым сердцем Тебе пети и славити.

На утрени

На Бог Господь: тропарь Богородицы, трижды.

По 1-м стихословии седален, глас 4:

Преспе днесь светлаго торжества,/ в земли Псковстей Мати Божия славно прославляется,/ дарова бо верным Свой Пречистый образ,/ емуже ныне поклоняющися,/ любовьию Богородицу восхваляем.

Слава, и ныне, тойже.

По 2-м стихословии седален, глас 8:

О Тебе радуется, Благодатная, всякая тварь,/ ангельский собор и человеческий род,/ освященный храм и раю словесный,/ девственная похвало, из Неяже Бог воплотися и Младенец бысть,/ прежде век сый Бог наш,/ ложесна бо Твоя Престол сотвори/ и чрево Твое пространнее небес содела./ О Тебе радуется, Благодатная, всякая тварь, слава Тебе.

Слава, и ныне, тойже.

По полиелеи седален, глас 4:

Яко звезды благосветлыя,/ свод церковный украшают небожителю:/ Михаил Архангел с Гавриилом доблестию украшенни,/ верою непостыдною Довмонт со Иоасафом блистающии,/ Богородица же, едина всех Честнейшая, сияет, яко луна непорочная,/ свет от Солнца Правды Христа приемши.

Слава и ныне, тойже.

Степенна, 1-й антифон 4-го гласа. Прокимен, глас 4: Помяну имя Твое/ во всяком роде и роде. **Стих:** Отрыгну сердце мое слово благо, глаголю аз дела моя Цареву. **Всякое дыхание: Евангелие от Луки, зачало 4.**

По 50-м псалме стихира, глас 6:

Тебе присное радование подобает, Богородице,/ Ты же благоподражательное милосердие избравши,/ долу к нам, грешным, низходиши,/ скорбным мольбам внимлеши/ и сия Престолу Сына Твоего и Бога возносиши,/ да умолен будет Преблагий ходатайствы Твоими/ и подаст нам мир и велию милость.

Канон, глас 4.

Песнь 1

Ирмос: Отверзу уста моя,/ и наполнятся Духа,/ и слово отрыгну Царице Матери,/ и явлюся, светло торжествуя,/ и воспою, радуясь, Тоя чудеса.

Возжада душа моя воспети Тя, Владычице!/ Кую песнь принесу Богородице, недоумеюся окаянства моего ради,/ связан же ми язык и душа притрепетна есть,/ слово ми подаждь, Всепетая, во хвалении величати Тя.

От лет древних сокрывашеся священное Твое изображение,/ егда же в разоренней обители жизнь иноческая паки возродися,/ благоволила еси, Пречистая, сокровенный образ явити/ и икону Твою нам даровати.

Слава: Славим Тя, Богоневесто,/ рождшую Христа, Бога нашего,/ Егоже моли помиловати души наша.

И ныне: Воспоим, вси людие, Госпожу и Владычицу нашу Богородицу,/ Тою бо безбедно море житейское преходим/ и пристанище спасительное в Сыне Ея обретаем.

Песнь 3

Ирмос: Твоя песнословцы, Богородице,/ живой и независтный Источнице,/ лик Себе совокупльшыя, духовно утверди/ в Божественней Твоей славе,/ венцев славы сподоби.

Благоволила еси, Госпоже, яко святых обителей Преславная Игумения,/ на Снятней горе черноризиц сонм собрати,/ сего ради и честную икону Твою в знамение милости/ и неотступнаго покрова Твоего даровала еси.

Пение всякое побеждается песнословцев Твоих, Богородице,/ не возмогаем, брениии, достойно воспети Тя,/ ниже исчислити щедроты Твоя,/ ни поведати смирения глубину,/ ниже Божественныя любве тайну.

Слава: В Тебе, Пречистая, яко в чистейшем источнице, почерпаем силы и утешение,/ неоскудно бо милосердие и любовь Твою на нас, грешных, преизобильно изливаеши/ и рососою умиления жестосердых орошаеши.

И ныне: Богородице Дево,/ в молитвах Твоих мир не оставила еси,/ буди нам Путеводительница во Обители вечныя.

Седален, глас 2:

Днесь, светло ликующе,/ припадаем всеблагоевейно ко образу Пречистей,/ имже покров Матерний обители милостивно даровася.

Слава, и ныне, тойже.

Песнь 4

Ирмос: *Седяй в славе/ на Престоле Божества, во Облаце легце,/ прииде Иисус Пребожественный,/ нетленною дланию, и спасе зовущыя:/ слава, Христе, силе Твоей.*

Иже на огненных Херувимех седяй и певаемый от Серафим,/ во Твою честнейшую утробу сниде,/ ложесна девическая Престолом Божества соделав./ Даруй и нам, о Госпоже, храмы Духа Святаго достойны соделатися.

Яко древле род израильский в пустыни путеводивый,/ тако и ныне Господь иноком, яко возлюбленным чадом,/ Путеводительницу ко спасению, Облак легкий, Пречистую Матерь Свою являет.

Слава: Во едино иночествующих собравый, Господи,/ и заступление им образ Пречистыя Матере Твоея даровавый,/ источи благодать спасительную,/ да не престанут воспевати:/ слава, Христе, силе Твоей.

И ныне: Вся пророчества на Тебе исполнишася,/ и оружие крестное непорочную душу Твою пройде,/ сего ради смиреннейшей Послушницей воли Господни нарекаем Тя и молим:/ добродетелию сею обогати строптивая сердца наша,/ скоропослушная Агнице Пастыреначальника Христа.

Песнь 5

Ирмос: *Ужасошася всяческая/ о Божественной славе Твоей:/ Ты бо, Неискусобрачная Дево,/ имела еси во утробе над всеми Бога/ и родила еси Безлетнаго Сына,/ всем воспевающим Тя/ мир подавающая.*

Что Тя наречем, о Благодатная?/ Целомудрие Твое и ангелом предивно есть,/ паче снега убелилася еси девства чистотою/ и святынею Твоею преизобильно ныне райская селения благоухаеши:/ радуйся, девственная похвало, величаем Тя.

Чудо Твое, Богородице, ужасает и ангелы,/ вышши бо явилася еси всякия земныя и Небесныя твари,/ смирением превознесена и многоразличными добротами преукрашена,/ селение соделалася еси невместимаго Зиждителя Твоего.

Слава: Славят Тя ангельских воинств чиноначалия:/ Гавриил преизящнейший о чистоте вещает,/ Михаил доблественнейший о

добродетели поет,/ естество же все безплотных со страхом и любовью,
яко Божией Матери, поклоняется.

И ныне: К Тебе, Владычице, припадаем, обрести разрешение
лютых чающе,/ израстиша бо грехи наша плоды жестосердия и
омрачения./ Озари ны, светом Сына Твоего, во еже спастися нам.

Песнь 6

Ирмос: *Божественное сие и всечестное/ совершающе
празднество,/ богомудрии, Богоматере,/ приидите, руками воспоем:/
от Нея рождагося Бога славим.*

Измлада Богу посвященная,/ во святая святых, Богоотроковице,
пребывала еси,/ в законе Господни поучающися./ Сподоби нас творити
волю Господню/ и во Обители вечныя внити.

Яже о брале в Кане Галилейстей попечение имевшая,/ предстани
и ныне ходатайством Твоим/ и умоли Господа душам нашим веселию
Небесному приобщитися.

Слава: Приидите ныне, празднлюбцы,/ иночестии собори и
верных собрание,/ воскликнем Госпоже и Владычице нашей
Богородице:/ радуйся, земли Псковския покрове/ и обители
Снеготорския Отрадо и Утешение.

И ныне: Елей Матерния милости Твоя/ преизобильно излей
болезнующим душам нашим,/ яко да, скверны греховныя совлекшеся,
возможем чисте славити Тя/ и от Тебе рождагося Господа.

Кондак, глас 3:

Девы днесь священное торжество в Церкви совершается:/ на
Престоле бо Всецарица славно возседит/ и подаяние Божественныя
благодати/ нам от Спаса прилежно ходатайствует,/ ангели и человецы
раболепно Владычице предстоят,/ нас бо ради молит Богородица/
Превечнаго Бога.

Икос:

Украсися ныне, богоспасаемый граде Пскове,/ имея в себе гору
Снятную богопокровенную,/ идеже бо честный образ Богоматере в
храме Рождества Ея славно возсия./ Лицы иночестии и мирстии вкупе
радуйтеся:/ Иоасаф бо преподобный о святей обители своей ко
Пречистой Деве припадает/ и Довмонт благоверный о земли нашей
Богородице предстательствует,/ Михаил Архангел с Гавриилом
благовестником Всецарице служат,/ нас бо ради молит Богородица
Превечнаго Бога.

Песнь 7

Ирмос: Не послужиши твари богумудрии/ паче Создавшего,/ но огненное прещение мужески поправше,/ радовахуся, поюще:/ препетый отцев Господь и Бог, благословен еси.

Настагоша ны супостаты лукавии/ и, яко в печи огненной, от множества искушений обуреваемыя,/ ороси ны иссопом молитв Твоих/ и изведи из горнила страстного,/ да в мире душевном вопием Ти:/ радуйся, Купино, огнем Божества не опальшаяся.

Якоже древле землю Псковскую от иноверных нашествия многажды сохраняла еси,/ тако и ныне Взбранная Воевода явися,/ спаси души наша и набеги лукавых супостат потреби.

Слава: Не престаёт лик иноческий по вся дни славити Тя, Всепетую Матерь Бога нашего./ Ты бо, яко благоуханный крин, чистотою девства благоухаеши/ и ко ангельстей жизни монахов наставляеши.

И ныне: Приведи ны, Госпоже, в благочестии и правде пожити,/ возведи, во еже в преподобии и чистоте Сыну Твоему послужити,/ да, избегше шуиих, сопричтемся десным/ и сподобимся отцев Господа и Бога славити во веки.

Песнь 8

Ирмос: Отроки благочестивыя в пещи/ Рождество Богородичо спасло есть:/ тогда убо образуемое,/ ныне же действуемое,/ вселенную всю воздвизает пети Тебе:/ Господа пойте, дела,/ и превозносите Его во вся веки.

Трие отроцы в пещи вавилонстей благочестием древле спасошася,/ души же наша, грехом плененныя,/ на пажить спасительных заповедей Христовых, Владычице, направи,/ да непорочным путем оправданий Господних/ Горняго Иерусалима достигнем.

Бога Преплагаго умоли, Пречистая Богородице,/ от бед лютых избавитися нам,/ любовию чтущим Тя, Всепетая.

Слава: Иже крепость веры отроков в пещи крепостию огня искусивый/ и ревность паче огня тем подавый,/ светлым огнем Божества Твоего грешныя души наша озари,/ молитвами Пречистыя Матере Твоея.

И ныне: Предста Царица одесную Спаса в ризах позлащенных одеяна/ и многими добродетельми преукрашена,/ Божественным же смирением преиспещрена, взывающи:/ Господа пойте, дела, и превозносите Его во вся веки.

Песнь 9

Ирмос: Всяк земнородный/ да възыграется, Духом просвещаемь,/ да торжествует же безплотных умов естество,/ почитающее

*священное торжество Богоматере,/ и да вопиет:/ радуйся,
Всеблаженная Богородице,/ Чистая Приснодево.*

Величает Богородицу Пречистую Небесная Церковь и земная вкупе,/ Отроча бо дадеса нам,/ яко дождь на руно в девственную утробу Тоя сниде/ и чрево пространнее небес содела.

Вси святии о Тебе радуются,/ пророцы же исполнению предреченнаго ликуют:/ Слово бо Единородное, во Отеческих недрах безначально сидящее,/ на руку Матере Девы отроча зрится,/ Еммануилем нарицаемое.

Слава: Преславная Божия Мати и святых ангел святейшая,/ немолчно воспеваем Тя сердцем и усты:/ радуйся, кротостию препрославленная;/ радуйся, величием смирения превознесенная.

И ныне: Рождеством Твоим, Пречистая, спасение нам прииде,/ Горняя бо дольным совокупишася./ Темже вопием Ти:/ радуйся, Прозябением чревоношения благословение миру источившая.

Светилен:

Мати Света, Благословенная Богородице,/ просвети омраченная сердца наша огнем любви Божественныя,/ да, тою просвещаемы, востечем ко Свету всех светов,/ Сладчайшему Сыну Твоему.

Слава, и ныне, тойже.

На хвалитех стихиры, глас 4:

По глаголу Твоему, Богородице,/ ублажают Тя вси роди,/ сияния бо всех добродетелей/ пречудно в Тебе соединишася,/ и паче солнца чувственного духовному оку нашему блистаеши./ Воистину достойно есть величати Тя, Царице Небесная.

Вся пророчества на Тебе, Дево, исполнишася,/ Бог Слово из Тебе воплотися/ и, не рушив ключи девства, миру возсия,/ правоверныя же Тобою спасаются./ Сего ради не умолчим славы Твоея, Всепетая,/ и в веселии духовнем вси тако рцем:/ велия Ти похвала подобает, Мати Божия.

Естество человеческое рождеством Твоим превзошла еси,/ естество же ангельское всесовершенным смирением,/ сего ради земнороднии о Тебе хвалятся,/ чини же Небеснии в священном трепете изумляются./ Приими ныне с ликом ангельским сонм иноческий:/ Честнейшую Херувим и Славнейшую без сравнения Серафим,/ Тя воспевающий.

Во гласех трубных воспоем Деву Всенепорочную,/ ради образа Ея Снетогорскаго,/ псалтирми и гусльми доброгласными ублажим,/ устами и сердца умиленными прославим,/ чудеса бо Богородицы поведати преславно есть,/ нам же прилеплятися Ей, благо:/ радуйся, Надеждо наша и упование.

Слава, и ныне, глас 2:

Яко на огнезрачном Престоле,/ почи на руку Всецарицы, Иже ангелов Царь/ и Того Всеблагая дерзновенною десницею милостивно приклоняет,/ яко да, работы греховныя избавльшися,/ царское священие и язык свят/ Господеви приведемся.

Славословие великое и отпуст.
На Литургии служба вся Богородицы.